

**I soci de A Compagna, *Coë de mangiâ*, Ligurpress, Genova 2018, pagg. 344**

Dòppo o sucèssò de l'anno pasòu, co-o libbro *Coë de contase. Stöie de zeneixi*, i sòcci da Compagna en stæti ciamæ a-açimentase co-e riçette de cuxinn-a: àn rispòsto a l'apello in 104, e quarchedun à mandòu ciù de 'na riçetta, defæti en 165. Ma questo o no l'é in libbro comme ghe n'é 'n infinitæ: a sò particolaritæ a l'é intanto d'ese scritto in zeneize (ma tranquilli, gh'é a traduçion), e pöi che ògni riçetta a l'é ligâ a 'n aregòrdo personale, e anche questo, se voemmo, o l'é in mòddo de contase e de conòscise tra de niatri. O rizultato o l'é in libbro da tegnî a-a man, ch'o fa vegnî coæ de métise o scòsâ e inandiâ in pitansin.



**Fiorenzo Pampolini e Claudio Serra, *Quando viaggiamo col Tramway. Il tram a Genova tra passato e futuro*, Nuova Editrice Genovese, Genova 2016, pagg. 208**

Inta nòstra biblioteca gh'emmo za di atri libbri do Claudio Serra, senpre in scî mezzi de trasportò publichi: a guidovia pe-a Goàrdia (boletin 2/2015), ascensori e funiculari (2/2016), ferovia Zena-Cazella (2/2017). Stavòtta chi se parla do tram, che pe tanti anni o l'â portòu zenéixi e fòrèsti in gîo pe tutta a çitæ e pöi o l'é stæto eliminòu, arancæ tutte e colisse, perché pàiva che o trasportò in sce gomma o fise mëgio. Òua pâ che àgimo mangiòu de repentîo, perché o tram a conti fæti o l'é ciù econòmico e afidâbile, e se parla seriamente de remettilo, magari comensando da valadda do Bezagno. In fondo a-o libbro gh'é ascì 'n interessante panoramica in scê çitæ, in Italia e into mondo, che o tram ghe l'ân.



**Marisa Traxino, *Storie della storia di Genova*, Gammarrò Edizioni, Sestri Levante 2016, pagg. 222**

**Paola Pettinotti, *Storia di Genova dalle origini ai giorni nostri*, Edizioni Biblioteca dell'Immagine, Pordenone 2017, pagg. 388**

O primmo libbro o çerne, inta stöia de Zena, fæti e personaggi meno conosciui, comme prezenpio a primma Croxâ, i rapòrti tra Federigo II e o pappà Inocenzo IV Fieschi, a Bataggia da Melòia, i contrasti tra Zena e Veneçia, i Grimaldi e o prinçipato de Mónego, Giaxo Axòu (Assereto) e a bataggia de Ponza, Zena e a Còrsega, Massena e l'asedio de Zena do 1800, Nino Bixo e, pe finî, i Ducchi de Galiera, portæ comme ezenpio no ciù imitòu de intelligente generositæ inti confronti de Zena e di zeneixi. L'atro libbro o ne conta in cangio, inte 'n mòddo discorscivo ch'o a rende lègia, tutta intrega a nòstra stöia, pròpio da-o prinçipio a-a fin, e questa a l'é 'na particolaritæ, perché pò-u ciù i libbri de stöia no vègnan tanto avanti, a 'n çerto ponto s'afèrman. Tutti doî i libbri gh'an ascì de bèlle inlustraçoin.



**Corinna Praga, *La mia Postumia ed altre antiche vie nelle valli Bisagno e Polcevera e tra Voltri e Nervi*, Erga Edizioni, Genova 2017, pagg. 152**

O titolo o zeuga co-e asonanse: a-o pòsto de via Postumia, l'aotrice a scrive mia Postumia, e gh'é 'na raxon. Defæti, se discute ancon in sce quæ o fise o percorso de quell'antiga stradda consolare into tràeto vexin a Zena, e a Praga a gh'à 'na sò idea. Primma, però, de mostrânela, a ripòrta quello che in propòxito àn dito i atri, segge studioxi comme anche istituçoin, e solo dòppo, inte 'na cartinna, a ne fa vedde dove secondo lê a pasava e a ne gh'aconpagna passo passo, con spiegaçoin e fotografie a colori. Inte l'ùrtima parte do libbro a ne pòrta a paseggio in sce vie romane do Ponente e do Levante da nòstra çitæ, senpre co-o sò bèllo mòddo ch'o rende fâçile a letûa.

